



JUDICIAL SYSTEM MONITORING PROGRAMME

PROGRAMA DE MONITORIZAÇÃO DO SISTEMA JUDICIAL

Komunikadu Imprensa

Periodu : Janeiro 2011

Edisaun : 26 Janeiro 2011

JSMP Apoiu Proposta atu Sosa Kareta 13 no osan operasionál ba Polísia VPU

Judicial System Monitoring Programme (JSMP) liu husi unidade Programa Observasaun Parlamentu (POP) apoiu proposta alterasaun Lei Nu. 29/II atu sosa kareta 13, ho osan total US\$3,968,000 ba polísia Unidade Apoiu Vítima (VPU) no osan operasionál ho total US\$ 1,706,000.

Proposta ne'e apresenta husi Deputadu José Texeira, no Deputada Joséfa Soares husi bankada Fretilin no Deputadu Domingos Mesquita husi bankada PUN. Proposta alokasaun orsamentu hanesan haktuir iha leten ne'e ho objetivu atu ajuda vítima sira ne'ebé hetan violénsia doméstika iha área rurál hanesan Aldeia no Suku, Sub Distritu no Distritu atu prosesu sira nia kazu tuir prosesu formál iha tribunál.

Luis de Oliveira Sampaio Diretór JSMP haktuir katak : "JSMP apresia tebes inisiativa distintus deputadus sira nia partisipasaun ativu iha prosesu debate espesialidade. Tanbá prosesu hirak ne'e hatudu sira nia vontande polítiku, sensibilidade sosial no komitmentu polítiku atu fornese apoiu nesesariu ba implementasaun Lei Kontra Violensia Domestika ne'ebé aprova no promulga ona iha Jullu 2010 liu ba kotuk.

JSMP hanoin katak, importante teb-tebes atu hetan partisipasaun ativu husi deputadu sira atu analiza, verifika no ezamina proposta orsamentu ne'ebé apresenta husi kada ministériu atu asegura katak planu orsmentu annual estadu nian ne'e koresponde no refleta realidade no nesesidade sosial ohin lora nian. Tanbá ne'e JSMP enkoraja membru parlamentu sira atu ativu liu tan hodi harê no análiza didiak relevansia programa no numeru orsamentu ne'ebé membru governu sira propoin iha OJE tinan 2011 ne'e.

Mesmu proposta rua ne'ebé apresenta husi bankada oposisaun no ikus liu hetan votasaun, a favor 50, kontra 0 no abstensaun 6, husi deputadus tomak, maibé JSMP hein katak orsamentu alokadu ne'e sei utiliza tuir nesesidade ne'ebé.

Hare ba prosesu no dinamika polítika hirak ne'e hotu, JSMP ho laran haksolok kongratula membru parlamentu sira nia esforsu tanbá iha konsiensia tomak hodi vota afavor ba proposta refere no obriga Primeiru Ministru Sr. Kay Rala Xanana Gusmão ho Sekretariu Estadu Seguransa Sr. Francisco Guterres halo mudansa ba sira nia proposta.

JSMP hein katak, ho apoiu orsamentu espesial ne'e, polisia VPU sira sei utiliza ho didiak hodi servi no apoiu vítima sira iha futuru.

Atu hetan infórmasaun kle'an favor kontaktu:

Luis de Oliveira Sampaio

Direitor Ezekutivu JSMP

Diresaun e-mail: luis@jsmp.minihub.org

Landline: 3323883